

- सर्वोच्च न्यायालय कोलकाता मांय डॉक्टर सूं दुष्कर्म अर हत्या मामला री सुणवाई करी-चिकित्सा कर्मचारियां री सुरक्षा पक्की करबा खातर राष्ट्रीय कार्यबल बणायो।
- केन्द्र सरकार संघ लोक सेवा आयोग - यूपीएससी ने नौकरशाही मांय लैट्रल एंट्री सूं जुड्या विज्ञापन ने रद्द करबा रा निदेश दिया।
- राज्य निर्वाचन आयोग प्रदेश रा नगरीय निकायां मांय खाली व्ह्या पदां माथे उप चुनाव खातर चुनाव कार्यक्रम ऐलान कर्यो।
- प्रदेश मांय आज कठे-कठे हल्को अर तेज मेह बरस्यो - काल कोटा, भरतपुर, अजमेर, उदयपुर, बीकानेर अर जोधपुर संभागां मांय मेह बरस सके है।

000

सर्वोच्च न्यायालय स्वास्थ्य कर्मचारियां री सुरक्षा खातर राष्ट्रीय कार्यबल बणायो है। मुख्य न्यायाधीश न्यायमूर्ति डी.वाई. चन्द्रचूड री अगुवाई वाळी खंडपीठ कोलकाता रा सफाखाना मांय एक डॉक्टर सूं दुष्कर्म अर हत्या रा मामला री सुणवाई रे दौरान कार्यबल सूं तीन हफता रे भीतर आपरी अंतरिम अर दो महीना रे भीतर आखिरी रपट पेश करबा ने कह्या। मुख्य न्यायधीश कया के महिलावां री सुरक्षा पक्की करबा खातर अदालत देशभर सूं डॉक्टरां रो एक राष्ट्रीय कार्यबल बणावेला। यो कार्यबल इण भांत रा निर्देशां री सिफारिश करेला, जो पूरा देश मांय लागू व्हेला। देशभर रा डॉक्टर अर चिकित्सा कर्मचारियां रा असुरक्षित कामकाजी माहौल माथे चिंता जताता थकां न्यायालय कह्यो के हाल कानून डॉक्टरां री सांस्थानिक सुरक्षा बाबत कोई बात नी कह्यो है।

00000

केंद्रीय स्वास्थ्य मंत्रालय सफाखाना मांय सुरक्षा बढाबा खातर केन्द्र सरकार रा सफाखाना अर संस्थानां रा सगळा प्रमुखा ने कागद मांड्यो है। इण कागद मांय मंत्रालय दाखिला अर निकासी गलियारा अर संवेदनशील हलकां समेत खास ठोड़ां माथे चावती संख्या मांय सीसीटीवी कैमरा लगाबा रा निर्देश दिया। आपात स्थितियां मांय तुरंत कार्यवाही करबा खातर एक नियंत्रण कक्ष भी थापित करबा ने कह्यो गयो है। कागद मांय मांड्यो गयो है के निगरानी, गश्ती अर सफाखाना परिसर री निगरानी खातर चावती संख्या मांय प्रशिक्षित सुरक्षाकर्मी री तैनाती करी जाणी चाहिजे।

मंत्रालय बतायो के अधिकृत कर्मचारियां ने दाखिला अर निकासी द्वार माथे कड़ी निगरानी रे पछे मंजूरी दी जाणी चाहिजे। काम री टेम सफाखाना रा सगळा कर्मचारियां खातर पहचान पत्र दिखाया जाबा ने जरूरी करणो चाहिजे। सफाखाना मांय स्वास्थ्य सेवा कर्मचारियां रे खिलाफ हिंसा रोकबा खातर राज्य ने सजा रो प्रावधान करबा ने कह्यो गयो है। महिला स्वास्थ्य सेवा कर्मचारियां रा कार्यक्षेत्र, पार्किंग हलका अर दाखिला द्वार माथे प्रकाश री चौखी व्यवस्था व्हेणी चाहिजे। बुनियादी सुविधावां रे साथे चावती संख्या मांय सुरक्षित ड्यूटी कक्ष महिला स्वास्थ्य कर्मचारियां ने दियो जाणे चाहिजे। रा मांय दो महिला स्वास्थ्यकर्मियां री तैनाती करबा ने प्राथमिकता दी जाणी चाहिजे।

0000

केन्द्र सरकार संघ लोक सेवा आयोग -यूपीएससी ने नौकरशाही मांय निजी हलका रा विशेषज्ञा री सीधी भर्ती सूं जुड्या विज्ञापन ने रद्द करबा रा निर्देश दिया है। हाल ही मांय यूपीएससी केंद्रीय मंत्रालय मांय 45 संयुक्त सचिव, निदेशक अर उप सचिवां री नियुक्त करबा सूं जुड्यो एक विज्ञापन जारी कर्यो हो। विपक्षी पार्टियां इण विज्ञापन माथे प्रश्न उठाया हा। केंद्रीय मंत्री डॉ. जितेन्द्र सिंह यूपीएससी री अध्यक्ष प्रीति सूदन ने मांड्या कागद मांय कह्या के प्रधानमंत्री नरेन्द्र मोदी रो माननो है के लैट्रल एंट्री री प्रक्रिया संविधान मांय समानता अर सामाजिक न्याय रा सिद्धांत खासकर आरक्षण रा प्रावधान रे मुजब होणी चाहिजे। वे कह्या के सार्वजनिक रूजगार मांय आरक्षण सरकार रा सामाजिक न्याय ढांचां रो एक महताउ भाग है।

000

सर्वोच्च न्यायालय कानी ऊं एससी/एसटी आरक्षण बाबत लारला दिना दिया गया फैसला रे खिलाफ कुछेक संगठन काल बंद रो ऐलाण कर्यो है। बंद रे ऐलाण रे चालता जयपुर पुलिस सुरक्षा व्यवस्था माथे और सावचेती बरत री है। सोशल मीडिया अर दूजी ठोड़ां पुलिस आपरो संदेश लोगां ताई पूगायो है अर शांतिपूर्ण तरीका ऊं आंदोलन करबा न लेर न्यारा-न्यारा संगठनां सूं बातचीत करी है। जयपुर पुलिस व्यापार मंडल रे सागे भी लगातार बातचीत कर री है।

डीग जिला कलेक्टर श्रुति भारद्वाज अर जिला पुलिस अधीक्षक राजेश कुमार मीणा सगळा संगठनां ने एक-दूजा री मदद कर आपसी भाईचारा बणाया राखबा री अरज करी है। पुलिस अधीक्षक जिला रा सगळा थाना प्रभारियां अर पुलिस अधिकारियां ने गडबडी माथे पैनी नजर राखबा रा निर्देश दिया है। बंद रा आह्वान न लेर बालोतरा जिला कलेक्टर सुशील कुमार यादव वीसी रे जरिये सूं जिला रा सगळा अहलकारां अर कर्मचारियां ने मुख्यालय माथे मौजूद रहबा रा आदेश दिया। वणां सगळा

उपखण्ड अधिकारियों सूं सोशल मीडिया गतिविधियां माथे लगातार नजर राखबा ने कइया अर अफवाहां बाबत तुरंत जाणकारी देबा न कइया। इण सिलसिला मांय जिला कलेक्टर व्यापार मंडल रा नुमाइंदा रे सागे बैठक कर शांति बणाया राखबा री अरज करी। वणां न्यारा-न्यारा संगठनां सूं कइया के वे रैली ने शांतिपूर्ण अर तय मारग रे मुजब काड़े।

000

राज्य निर्वाचन आयोग प्रदेश रा नगरीय निकाया मांय खाली पड़या पद माथे उपचुनाव करबा खातर चुनाव कार्यक्रम ऐलान कइयो है। चुनाव कार्यक्रम रा ऐलान रे साथे ही इण सूं जुड़या निर्वाचन हलका मांय तुरंत प्रभाव सूं आचार संहिता लागू व्हे गयी। मुख्यनिर्वाचन अधिकारी अर सचिव संचिता बिश्नोई बताया के प्रदेश रा 11 जिला बारां, बीकानेर, चित्तौड़गढ़, चूरू, दौसा, धौलपुर, जालौर, गंगापूर सिटी, कोटा, श्रीगंगानगर अर अनूपगढ़ रा कुल 12 नगर निकायां मांय अध्यक्ष, उपाध्यक्ष अर सदस्य रा खाली पदां माथे उपचुनाव व्हेला।

000

प्रदेश मांय राज्यसभा री एक सीट खातर होबा वाळा उपचुनाव बाबत नामांकन रो काल आखिरी दिन है। ई सीट खातर भारतीय जनता पार्टी हाल ताई आपरो उम्मीदवार तय नी कइयो है। भाजपा रा प्रदेशाध्यक्ष मदन राठौड़ बताया के सिम्बल आ ग्यो है अर बेगी ही राज्यसभा उम्मीदवार रो नाम भी तय कर लियो जावेला। भाजपा प्रत्याशी काल नामांकन भरेला। ई बीच, कांग्रेस इण राज्यसभा उप चुनाव खातर उम्मीदवार नी उतारबा रो ऐलान कइयो है। पार्टी रा प्रदेशाध्यक्ष गोविन्द सिंह डोटासरा आज जयपुर मांय मीडिया ने बताया के राज्यसभा उपचुनाव मांय कांग्रेस आपरो उम्मीदवार नी उतारेला। भारतीय जनता पार्टी रे कने इण ने जीतबा खातर चावतो बहुमत है। कांग्रेस कानी ऊं उम्मीदवार नी उतारबा री हालत मांय भाजपा प्रत्याशी रो निर्विरोध निर्वाचित होणो करीब-करीब तय मान्यो जा रह्यो है।

000

भारतीय जनता पार्टी राज्य मांय एक सितम्बर सूं व्यापक सदस्यता अभियान सुरू करेला। ई अभियान रा तैत प्रदेश मांय एक करोड़ सदस्य बणाबा रो लगस है। पार्टी रा सदस्यता अभियान बाबत आज जयपुर मांय पार्टी रा आला पदाधिकारियां री बैठक व्ही, जिण मांय ई अभियान री रण नीति ने आखिरी रूप दियो गयो। सदस्यता अभियान रा संयोजक अरुण चतुर्वेदी आज मीडिया सूं बातचीत मांय बताया के प्रदेश मांय 51 हजार बूथ माथे 200-200 सदस्य बणाया जावेला। ई अभियान खातर हर स्तर माथे कार्यशालावां राखी जावेला। एक सितम्बर ने प्रधानमंत्री ई अभियान री सुरूआत करेला। इणरे पछे चार अर पांच सितम्बर ने ई अभियान ने जिलास्तर माथे सुरू कइयो जावेला।

पैली रा प्रधानमंत्री राजीव गांधी री जयंती आज देशभर मांय सदभावना दिवस रा रूप मांय मनायी गई। प्रधानमंत्री नरेंद्र मोदी आज पैली रा प्रधानमंत्री राजीव गांधी ने वां री जयंती रे मौके श्रद्धाजंलि दी। लोकसभा मांय विपक्ष रा नेता अर कांग्रेस सांसद राहुल गांधी नई दिल्ली मांय वीर भूमि जा र पैली रा प्रधानमंत्री राजीव गांधी रे फूल चढ़ाया। अठीने प्रदेश रा न्यारा-न्यारा जिला मांय भी पैली रा प्रधानमंत्री राजीव गांधी री जयंती माथे श्रद्धाजंलि कार्यक्रम व्हा। पाली मांय कांग्रेस कार्यकर्ता वां री तस्वीर माथे फूल चढ़ा र श्रद्धाजंलि दी। जिला कांग्रेस कमेटी दौसा री कानी ऊं कांग्रेस कार्यालय मांय भारत रत्न श्री गांधी री जयंती माथे कार्यकर्ता वां रा छायाचित्र माथे फूल चढ़ाया। हनुमानगढ़ टाउन मांय 'राजीव गांधी के दर्शन' विषय माथे संगोष्ठी राखी गई। शाहपुरा मांय न्यारा-न्यारा संगठनां री कानी ऊं श्रद्धाजंलि सभा समेत केई कार्यक्रम राख्या गया। बीकानेर मांय राजीव गांधी री जयंती माथे शहर अर देहात जिला कांग्रेस कमेटी री कानी ऊं सभा करर फूल चढ़ाया गया। भरतपुर मांय इण दिन ने सदभावना दिवस रा रूप मांय मनायो गयो। कांग्रेस कमेटी री कानी ऊं राख्या कार्यक्रम मांय वां रा चित्र माथे फूल चढ़ा र याद कइयो गयो।

000

राज्य मांय लारला 24 घंटां मांय कठे-कठे हल्की सूं तेज बारिश व्ही। मौसम केन्द्र जयपुर रे मुजब सब ऊं बत्ती 13 सेंटीमीटर बारिश अलवर रा बानसूर मांय व्ही। चूरू रा राजगढ़ मांय 10, बहरोड़ मांय 9, मंडावर, खैरथल, बहादुरपुर अर भरतपुर रा भुसावर मांय 8-8 सेंटीमीटर मेह बरस्यो। इण बीच, राजधानी जयपुर मांय आज कुछेक ठोडां माथे तेज तो कठे-कठे बूदाबांदी रा समाचार है। **नीमका थाना मांय दोपहर तेज मेह बरस्यो, जिणसूं आमजन ने राहत मिली। अठीने दौसा मांय भी मूसलाधार मेह बरस्यो, जिणसूं शहर रा निचला इलाकां मांय पाणी भर्ग्यो।** मौसम केन्द्र रे मुजब काल कोटा, भरतपुर, अजमेर, उदयपुर, बीकानेर अर जोधपुर संभागां मांय कठे-कठे हलका सूं मझलो मेह बरस सके है।

000

प्रमुख शासन सचिव कृषि अर उद्यानिकी वैभव गालरिया री अगुवाई मांय आज पंत कृषि भवन मांय विभागीय बजट घोषणावां ने लागू करबा खातर समीक्षा बैठक राखी गई। इण मौके श्री गालरिया कइया के योजनावां रा विभागीय प्रभारी बजट योजनावां ने लागू करबा री गति ने बढ़ावे, जिण सूं बत्ता ऊं बत्ता काश्तकारां ने फायदो पुगायो जा सके। वे कइया के योजनावां रो फायदो गांवाई हलकां रा आखिरी क्षोर माथे बेदुया काश्तकार ताई पूगणो चाहिजे, जिण सूं काश्तकारां री माली हालत मजबूत बणेला। बैठक मांय आला अधिकारी अर योजनावां रा प्रभारी अधिकारी मौजूद रिया।

000

राष्ट्रपति द्रौपदी मुर्मू प्राकृतिक आपदावां री वजह सूं मरबाळा री संख्या कम करबा खातर देश री पूर्वानुमान प्रणाली ने सरल अर सटीक बणाबा री जरूरत माथे बल दियो। वणां राष्ट्रपति भवन मांय आज राष्ट्रीय-भू-विज्ञान पुरस्कार दीना। ई मौके राष्ट्रपति कह्या के भूस्खलन वाळा राज्यां मांय पैली चेतावनी देबा वाळा समाचार जारी करबा खातर राष्ट्रीय भूस्खलन पूर्वानुमान केंद्र कोलकाता मांय थापित कर्यो जा रह्यो है। राष्ट्रपति कह्या के 2047 ताई एक विकसित राष्ट्र बणाबा खातर भारत ने खनिज उत्पादन मांय आत्मनिर्भर बणनो पडेला। वणां 12 हलकां मांय 21 भू-वैज्ञानिकां ने राष्ट्रीय भू-विज्ञान पुरस्कार दीना।

0000